

摘藻堂四庫全書薈要

集部

欽定四庫全書薈要

集部

御選唐宋詩醇卷十一

詳校官原任主事<sub>臣</sub>李斯咏



欽定四庫全書薈要

御選唐宋詩醇卷十一

襄陽杜甫詩三

目錄

乾元中寓居同谷縣作歌七首

水會渡

飛仙閣

龍門閣



石櫃閣

桔柏渡

劔門

成都府

石犀行

題壁畫馬歌

戲題畫山水圖歌

題李尊師松樹障子歌

戲為雙松圖歌

病柏

病橘

枯椶

枯柟

戲作花卿歌

柟樹為風雨所拔嘆

茅屋為秋風所破歌

天邊行

苦戰行

述古

觀打魚歌

又觀打魚

越王樓歌

冬到金華山觀因得故拾遺陳公學堂遺跡

通泉驛南去通泉縣十五里山水作

過郭代公故宅

短歌行

桃竹杖引

韋諷錄事宅觀曹將軍畫馬圖

丹青引

發閬中

寄韓諫議

憶昔

冬狩行

別唐十五誠因寄禮部賈侍郎

閩山歌

閩水歌

草堂

太子張舍人遺織成褥段

杜鵑

客堂



水閣朝霽奉簡嚴雲安

蠶穀行

古柏行

縛鷄行

牽牛織女

殿中楊監見示張旭草書圖

課伐木

槐葉冷淘

行官張望補稻畦水歸

上後園山脚

驅豎子摘蒼耳

秋行官張望督促東渚耗稻向畢清晨遣女奴阿  
稽豎子阿段往問

御選唐宋詩醇卷十一目錄

欽定四庫全書薈要卷一萬九千三百三十五集部

御選唐宋詩醇卷十一

襄陽杜甫詩三

乾元中寓居同谷縣作歌七首

有客有客字子美白頭亂髮垂過耳歲拾橡栗隨狙公  
天寒日暮山谷裏中原無書歸不得手脚凍皴皮肉死  
嗚呼一歌兮歌已哀悲風為我從天來

舊唐書時穀食踴貴甫寓居成州同谷縣自負薪拾

招兒女饑殍者數人

長鑿長鑿白木柄我生託子以為命黃獨無苗山雪盛  
短衣數挽不掩脛此時與子空歸來男呻女吟四壁靜  
嗚呼二歌兮歌始放鄰里為我色惆悵

仇兆鰲曰山谷云陳藏器本草載黃獨遇霜雪枯無  
苗蓋蹲鴟之類蔡夢弼引別注云黃獨歲饑土人掘  
以充糧公詩屢用黃精不必作黃獨按公詩若太平  
寺泉眼及丈人山皆為引年而發此歌則為救饑而

言主黃獨為是

有弟有弟在遠方  
三人各瘦何人強  
生別展轉不相見  
胡塵暗天道路長  
東飛駕鵞後鵞  
鵠安得送我置汝旁  
嗚呼三歌兮歌三發  
汝歸何處收兄骨

趙叟曰公四弟曰穎觀豐占各散在他郡惟占從公

入蜀

有妹有妹在鍾離  
良人早歿諸孤癡  
長淮浪高蛟龍怒  
十年不見來何遲  
扁舟欲往箭滿眼  
杳杳南國多旌旗

嗚呼四歌兮歌四奏林猿為我啼清晝

朱鶴齡曰猿多夜啼今啼清晝極言其悲也解作竹  
林穿鑿難信

四山多風溪水急寒雨颯颯枯樹濕黃蒿古城雲不開  
白狐跳梁黃狐立我生何為在窮谷中夜起坐萬感集  
嗚呼五歌兮歌正長魂招不來歸故鄉

仇兆鰲曰此歌忽然變調寫得山昏水惡雨驟風狂  
荒城晝暝野狐羣嘯頓覺空谷孤危萬感交迫招魂

於生前收骨於死後見存亡總不能自必矣  
南有龍兮在山湫古木龍從枝相樛木葉黃落龍正蟄  
蝮蛇東來水上遊我行怪此安敢出拔劍欲斬且復休  
嗚呼六歌兮歌思遲溪壑為我迴春姿

王道俊曰前後六章皆自叙流離之感不應此章獨  
譏時事蓋詠同谷萬丈潭之龍也郭知達引蘇注云  
此詩南有龍喻明皇在南內東坡必無是言

男兒生不成名身已老三年饑走荒山道長安卿相多

少年富貴應須致身早山中儒生舊相識但話宿昔傷  
懷抱嗚呼七歌兮悄終曲仰視皇天白日速

慷慨悲歌足以裂山石而立海水殆所謂自鑄離騷者  
史遷云人勞苦倦極未嘗不呼天也疾痛慘怛未嘗不  
呼父母也甫之遇為何如哉流離困頓轉徙山谷仰天  
一呼萬感交集而筆之奇氣之豪又足以發其所感淋  
漓頓挫自成音節自古及今不可有二宋祁云莫肯念  
亂小雅怨自然流泣袁安愁此之謂矣歌中思及弟妹



字字至情南有龍一篇感時憫亂實有寓意若謂為明皇而作則不免牽合耳

李廌曰太白遠別離蜀道難與子美同谷七歌風騷極致不在屈宋之下

胡應麟曰杜七歌亦倣張衡四愁然七歌奇崛雄深四愁和平婉麗漢唐短歌各為絕唱所謂異曲同工王嗣奭曰七歌創作原不倣離騷而哀實過之讀離騷未必墮淚而讀此不能終篇則以節短而聲促也

仇兆鰲曰七歌結語皆本蔡琰胡笳曲

水會渡

山行有常程中夜尚未安  
微月沒已久崖傾路何難  
大江動我前洶若溟渤寬  
篙師暗理楫歌笑輕波瀾  
霜濃木石滑風急手足寒  
入舟已千憂陟巘仍萬盤  
迴眺積水外始知衆星乾  
遠遊令人瘦衰疾慙加餐

仇兆鰲曰曹孟德詩星漢燦爛若出其裏與杜句可

參看

飛仙閣

土門山行窄微徑緣秋豪棧雲闌干峻梯石結構牢萬  
壑敬疎林積陰帶奔濤寒日外淡泊長風中怒號歇鞍  
在地底始覺所歷高往來雜坐卧人馬同疲勞浮生有  
定分饑飽豈可逃歎息謂妻子我何隨汝曹

龍門閣

清江下龍門絕壁無尺土長風駕高浪浩浩自太古危  
途中縈盤仰望垂綫縷滑石欹誰鑿浮梁裊相柱目眩

金五口人卷十一  
卷十一  
隕雜花頭風吹過雨百年不敢料一墜那得取飽聞經  
瞿塘足見度大庾終身歷艱險恐懼從此數

石櫃閣

季冬日已長山晚半天赤蜀道多早花江間饒奇石  
石櫃曾波上臨虛蕩高壁清暉回羣鷗暝色帶遠客羈棲  
負幽意感歎向絕跡信甘孱懦嬰不獨凍餒迫優游謝  
康樂放浪陶彭澤吾哀未自安謝爾性所適

暝色帶遠客造語入妙光祿坂行云暝色無人獨歸客

雋致減矣

桔柏渡

青冥寒江渡，駕竹為長橋。  
竿濕烟漠漠，江永風蕭蕭。  
連竿動嫋娜，征衣颯飄飄。  
急流鴛鷺散，絕岸鼉鼉驕。  
西轅自茲異，東逝不可要。  
高通荆門路，闊會滄海潮。  
孤光隱顧眄，遊子悵寂寥。  
無以洗心胸，前登但山椒。

劔門

惟天有設險，劔門天下壯。  
連山抱西南，石角皆北向。  
兩

崖崇墉倚刻畫城郭狀一夫怒臨關百萬未可傍珠玉  
走中原岷峨氣悽愴三皇五帝前鷄犬各相放後王尚  
柔遠職貢道已喪至今英雄人高視見霸王并吞與割  
據極力不相讓吾將罪真宰意欲鏟疊嶂恐此復偶然  
臨風默惆悵

危時之慮與劔閣銘固自有異若李商隱井絡一首乃  
用銘意者

江盈科曰少陵秦州以後詩突兀宏肆迥異昔作非

有意換格蜀中山水自是挺特奇崛獨能象景傳神  
使人讀之山川歷落居然在眼所謂春蠶結繭隨物  
肖形乃為真詩人真手筆也

胡夏客曰劍門詩因劍閣銘而成但銘詞出以莊嚴  
此詩尤加雄肆用古而能勝於古人方稱作家

朱鶴齡曰蜀為財賦所出自明皇臨幸供億不貲民  
力盡矣民力盡而寇盜乘之晉李特流人之禍可為  
明鑒此詩故有岷峨悽愴與英雄割據之慮也

成都府

翳翳桑榆日照我征衣裳我行山川異忽在天一方但  
逢新人民未卜見故鄉大江東流去游子去日長曾城  
填華屋季冬樹木蒼喧然名都會吹簫聞笙簧信美無  
與適側身望川梁鳥雀夜各歸中原杳茫茫初月出不  
高衆星尚爭光自古有羈旅我何苦哀傷

語意多本古人較途中諸作雖氣度少舒而憂思未嘗  
忘也初月兩語上承中原一句王應麟以謂肅宗初立



盜賊未息最為得解蓋至此身事少定不覺念及朝廷  
甫豈須臾忘君者哉

石犀行

君不見秦時蜀太守刻石立作三犀牛自古雖有厭勝  
法天生江水向東流蜀人矜誇一千載泛溢不近張儀  
樓今年灌口損戶口此事或恐為神羞終藉隄防出衆  
力高擁木石當清秋先王作法皆正道詭怪何得參人  
謀嗟爾三犀不經濟缺訛只與長川逝但見元氣常調

和自免洪濤恣凋瘵安得壯士提天綱再平水土犀奔  
茫

斥不經之談歸之正道筆力傑異不落言筌視石笋行  
尤為擅勝

題壁畫馬歌

原注章  
偃畫

韋侯別我有所適知我憐君畫無敵戲拈秃筆掃驊  
歛見騏驎出東壁一匹齧草一匹嘶坐看千里當霜蹄  
時危安得真致此與人同生亦同死

屹然健筆轉出命意乃詩人之旨

戲題畫山水圖歌

原注王宰畫  
宰丹青絕倫

十日畫一水五日畫一石能事不受相促迫王宰始肯  
留真跡壯哉崑崙方壺圖挂君高堂之素壁巴陵洞庭  
日本東赤岸水與銀河通中有雲氣隨飛龍舟人漁子  
入浦淑山木盡亞洪濤風尤工遠勢古莫比咫尺應須  
論萬里焉得并州快剪刀剪取吳松半江水

一無名氏西清詩話曰梁蕭文真善畫於扇上圖山水

咫尺之內便覺萬里為遙老杜云尤工遠勢古莫比  
咫尺應須論萬里乍讀似非用事如男兒既介冑長  
揖別上官用介冑之士不拜婦人在軍中兵氣恐不  
揚用軍中豈有女子乎皆用其事而隱其語

題李尊師松樹障子歌

老夫清晨梳白頭玄都道士來相訪握髮呼兒延入戶  
手提新畫青松障障子松林靜杳冥憑軒忽若無丹青  
陰崖却承霜雪幹偃蓋反走虬龍形老夫平生好竒古

對此與與精靈聚已知仙客意相親更覺良工心獨苦  
松下丈人巾屨同偶坐似是商山翁悵望聊歌紫芝曲  
時危慘澹來悲風

戲為雙松圖歌

原注  
韋偃

天下幾人畫古松畢宏已老韋偃少絕筆長風起纖末  
滿堂動色嗟神妙兩株慘裂苔蘚皮屈鐵交錯迴高枝  
白摧朽骨龍虎死黑入太陰雷雨垂松根胡僧憇寂寞  
龐眉皓首無住著偏袒右肩露雙腳葉裏松子僧前落

韋侯韋侯數相見我有一匹好東絹重之不減錦繡段  
已令拂拭光凌亂請公放筆為直幹

題畫諸篇刻意冥搜積思獨造與太白觀粉圖山水諸  
篇並駕齊驅遂為此體之祖至於思業高竒絕幽鑿險  
則杜老又似稍優者蓋其詣力所近更覺良工心獨苦  
也

沈德潛曰突兀起不妨平接如堂上不合生楓樹下  
云聞君掃却赤縣圖是也平調起必警語接此詩是

也學者於此求之思過半矣

病栢

有栢生崇岡童童狀車蓋偃蹙龍虎姿主當風雲會神  
明依正直故老多再拜豈知千年根中路顏色壞出非  
不得地蟠據亦高大歲寒忽無憑日夜柯葉改丹鳳領  
九雛哀鳴翔其外鴟鴞志意滿養子穿穴內客從何鄉  
來佇立久吁怪靜求元精理浩蕩難倚賴

託喻之言可垂鑒戒

葉夢得曰此詩為明皇而作

病橘

羣橘少生意雖多亦奚為惜哉結實小酸澀如棠梨剖  
之盡蠹蟲采掇爽其宜紛然不適口豈只存其皮蕭蕭  
半死葉未忍別故枝玄冬霜雪積况乃迴風吹嘗聞蓬  
萊殿羅列瀟湘姿此物歲不稔玉食失光輝寇盜尚憑  
陵當君減膳時汝病是天意吾諗罪有司憶昔南海使  
奔騰獻荔支百馬死山谷到今耆舊悲



因病橘而回憶荔枝婉轉言之多少慨歎

枯椶

蜀門多椶櫚高者十八九其皮割剝甚雖衆亦易朽徒  
布如雲葉青黃歲寒後交橫集斧斤凋喪先蒲柳傷時  
苦軍乏一物官盡取嗟爾江漢人生成復何有有同枯  
椶木使我沈嘆久死者即已休生者何自守啾啾黃雀  
啁側見寒蓬走念爾形影乾摧殘沒藜莠

仇兆鰲曰詩中詠物之作有就本題作結者此章是

也有借客意作結者病橘枯柟是也可悟詩家擒縱之法

枯柟

榘柟枯崢嶸鄉黨皆莫記不知幾百歲慘慘無生意上  
枝摩皇天下根蟠厚地巨圍雷霆拆萬孔蟲蟻萃凍雨  
落流膠衝風奪佳氣白鵠遂不來天鷄為愁思猶含棟  
梁具無復霄漢志良工古昔少識者出涕淚種榆水中  
央成長何容易截承金露盤裊裊不自畏

四詩皆託物起興風人之嗣音也

葉夢得曰此詩當是為房次律而作

浦起龍曰四詩寄託遙深斂鋒鏑為之力追古作者

戲作花卿歌

成都猛將有花卿學語小兒知姓名用如快鶻風火生  
見賊唯多身始輕綿州副使著柘黃我卿掃除即日平  
子璋髑髏血模糊手提擲還崔大夫李侯重有此節度  
人道我卿絕世無既稱絕世無天子何不喚取守京都

收筆婉轉自如所謂意愜闕飛動者不獨子璋一句凜凜有生色也

唐書上元二年四月梓州刺史段子璋反襲東川節度使李真於綿州自稱梁王五月成都尹崔光遠率將花驚定攻拔綿州斬子璋

柵樹為風雨所拔歎

倚江柵樹草堂前故老相傳二百年誅茅卜居總為此五月髣髴聞寒蟬東南飄風動地至江翻石走流雲氣

幹排雷雨猶力爭根斷泉源豈天意滄波老樹性所愛  
浦上童童一青蓋野客頻留懼雪霜行人不過聽箏籟  
虎倒龍顛委榛棘淚痕血點垂胸臆我有新詩何處吟  
草堂自此無顏色

勢取矯厲意主樸真

茅屋為秋風所破歌

八月秋高風怒號卷我屋上三重茅  
茅飛度江灑江郊  
高者掛罥長林梢下者飄轉沉塘坳  
南村羣童欺我老

無力忍能對面為盜賊公然抱茅入竹去唇焦口燥呼  
不得歸來倚杖自歎息俄頃風定雲墨色秋天漠漠向  
昏黑布衾多年冷似鐵驕兒惡卧踏裏裂床床屋漏無  
乾處雨脚如麻未斷絕自經喪亂少睡眠長夜沾濕何  
由徹安得廣廈千萬間大庇天下寒士俱歡顏風雨不  
動安如山嗚呼何時眼前突兀見此屋吾廬獨破受凍  
死亦足

極無聊事以直寫見筆力入後大波軒然而起疊筆作

收如龍掉尾非僅見此老胸懷若無此意則詩亦可不作

朱鶴齡曰白樂天云安得布裘長萬丈與君都蓋洛陽城同此意

天邊行

天邊老人歸未得日暮東臨大江哭隴右河源不種田  
胡騎羌兵入巴蜀洪濤滔天風拔木前飛禿鶩後鴻鵠  
九度附書向洛陽十年骨肉無消息

苦戰行

苦戰身死馬將軍自云伏波之子孫干戈未定失壯士  
使我歎恨傷精魂去年江南討狂賊臨江把臂難再得  
別時孤雲今不飛時獨看雲淚橫臆  
情溢乎詞音長節短

述古

赤驥頓長纓非無萬里姿悲鳴淚至地為問馭者誰鳳  
凰從東來何意復高飛竹花不結實念子忍朝饑古時



君臣合可以物理推賢人識定分進退固其宜

唐汝詢曰驥無良馭則踈萬里之能鳳無竹實則高飛而不下君臣相合之義當以此理推之賢者固知所自守而用人者可不加之意乎

市人日中集於利競錐刀置膏烈火上哀哀自煎熬農人望歲稔相率除蓬蒿所務穀為本邪羸無乃勞舜舉十六相身尊道何高秦時任商鞅法令如牛毛

比賦相兼名論不朽蘇軾以末四句為稷契輩人語信

有其意

朱鶴齡曰是時第五琦劉晏皆以宰相領度支鹽鐵使權稅四出利析錐刀故言為治之道在乎博本抑末舉良相以任之不當用與利之臣以滋民偽也

觀打魚歌

綿州江水之東津  
魴魚鱖魚色勝銀  
漁人漾舟沉大網  
截江一擁數百鱗  
衆魚常才盡却棄  
赤鯉騰出如有神  
潛龍無聲老蛟怒  
回風颯颯吹沙塵  
饕子左右揮霜刀

膾飛金盤白雪高  
徐州禿尾不足憶  
漢陰槎頭遠遁逃  
魴魚肥美知第一  
既飽歡娛亦蕭瑟  
君不見朝來割素  
鬻咫尺波濤永相失

又觀打魚

蒼江漁子清晨集  
設網提網萬魚急  
能者操舟疾若風  
撐突波濤挺叉入  
小魚脫漏不可記  
半死半生猶戢戢  
大魚傷損皆垂頭  
屈強泥沙有時立  
東津觀魚已再來  
主人罷鱸還傾盃  
日暮蛟龍改窟穴  
山根鱸鮓隨雲雷

干戈兵革鬪未止  
鳳凰麒麟安在哉  
吾徒胡為縱此樂  
暴殄天物聖所哀

指事言情詞意簡遠  
如龍門之桐百尺無枝  
又如萬石洪鐘不作細響  
此所以為大家

仇兆鰲曰從竭澤而漁處寫出慘酷可憐之狀具見  
愛物仁心

黃生曰前詩寓感此詩寓規體物既精命意復遠

越王樓歌

綿州州府何磊落顯慶年中越王作孤城西北起高樓  
碧瓦朱甍照城郭樓下長江百丈清山頭落日半輪明  
君王舊跡今人賞轉見千秋萬古情

泠泠雅調或謂倣王子安滕王閣而風致小遜非也

冬到金華山觀因得故拾遺陳公學堂遺跡

涪右衆山內金華紫崔嵬上有蔚藍天垂光抱瓊臺繫  
舟接絕壁杖策窮縈回四顧俯層巔淡然川谷開雪嶺  
日色死霜鴻有餘哀焚香玉女跪霧裏仙人來陳公讀

書堂石柱仄青苔悲風為我起激烈傷雄才

通泉驛南去通泉縣十五里山水作

溪行衣自濕亭午氣始散冬溫蚊蚋在人遠鳧鴨亂登  
頓生曾陰蔽傾出高岸驛樓衰柳側縣郭輕烟畔一川  
何綺麗盡目窮壯觀山色遠寂寞江光夕滋漫傷時愧  
孔父去國同王粲我生苦飄零所歷有嗟嘆  
眼前景色寫出自有佳致

過郭代公故宅

豪俊初未遇其跡或脫畧代公尉通泉放意何自若及  
夫登袞冕直氣森噴薄磊落見異人豈伊常情度定策  
神龍後宮中翕清廓俄頃辨尊親指揮存顧託羣公有  
慚色王室無削弱迴出名臣上丹青照臺閣我行得遺  
跡池館皆疏鑿壯公臨事斷顧步涕橫落高咏寶劍篇  
神交付冥漠

仇兆鰲曰俄頃辨尊親推其決幾之明壯公臨事斷  
服其應變之敏二語能寫出代公身分荀彧之失身

誤於不能辨陳竇之債事失於不能斷杜詩論人必  
具特識推此可見

短歌行

原注贈王  
郎司直

王郎酒酣拔劍斫地歌莫哀我能拔爾抑塞磊落之奇  
才豫樟翻風白日動鯨魚跋浪滄溟開且脫佩劍休徘  
徊西得諸侯棹錦水欲向何門躡珠履仲宣樓頭春色  
深青眼高歌望吾子眼中之人吾老矣

劉會孟曰豪氣激人堂堂復堂堂



盧世灌曰突兀橫絕跌宕悲涼

桃竹杖引

江心蟠石生桃竹蒼波噴浸尺度足斬根削皮如紫玉  
江妃水仙惜不得梓潼使君開一束滿堂賓客皆歎息  
憐我老病贈兩莖出入爪甲鏗有聲老夫復欲東南征  
乘濤鼓枻白帝城路幽必為鬼神奪拔劍或與蛟龍爭  
重為告曰杖兮杖兮爾之生也甚正直慎勿見水踴躍  
學變化為龍使我不得爾之扶持滅跡於君山湖上之

青峰噫風塵瀕洞兮豺虎咬人忽失雙杖兮吾將曷從  
奇變酷似太白老杜真乃無所不有

朱鶴齡曰此詩蓋借竹杖以規諷章留後也既以踴  
躍為龍戒之又以忽失雙杖危之其微旨可見

仇兆鰲曰宋之問騷體詩有嵩山天門歌杜詩此篇  
所自出然杜之靈奇却勝於宋之雋麗

韋諷錄事宅觀曹將軍畫馬圖

國初已來畫鞍馬神妙獨數江都王將軍得名三十載

人間又見真乘黃會貌先帝照夜白龍池十日飛霹靂  
內府殷紅馬腦盤婕妤傳詔才人索盤賜將軍拜舞歸  
輕紈細綺相追飛貴戚權門得筆跡始覺屏障生光輝  
昔日太宗拳毛騮近時郭家師子花今之畫圖有二馬  
復令識者久歎嗟此皆騎戰一敵萬縞素漠漠開風沙  
其餘七匹亦殊絕迥若寒空動烟雪霜蹄蹴踏長楸間  
馬官廝養森成列可憐九馬爭神駿顧視清高氣深穩  
借問苦心愛者誰後有韋諷前支遁憶昔巡幸新豐宮

翠華拂天來向東騰驤磊落三萬匹皆與此圖筋骨同  
自從獻寶朝河宗無復射蛟江水中君不見金粟堆前  
松柏裏龍媒去盡鳥呼風

蒼莽歷落中法律深細前從照夜白叙入即伏末段感  
慨中間錯綜九馬文勢跌宕可謂毫髮無遺憾波瀾獨  
老成矣七古至於老杜浩浩落落獨往獨來神龍在霄  
連蜺變化不可方物天馬行空脫去羈勒足以橫睨一  
世獨有千古東坡書韓幹牧馬圖猶非其匹况他人乎

丹青引

原注贈曹將軍霸

將軍魏武之子孫於今為庶為清門英雄割據雖已矣  
文彩風流猶尚存學書初學衛夫人但恨無過王右軍  
丹青不知老將至富貴於我如浮雲開元之中常引見  
承恩數上南薰殿凌烟功臣少顏色將軍下筆開生面  
良相頭上進賢冠猛將腰間大羽箭褒公鄂公毛髮動  
英姿颯爽來酣戰先帝天馬玉花驄畫工如山貌不同  
是日牽來赤墀下迴立閭闔生長風詔謂將軍拂絹素

意匠慘淡經營中斯須九重真龍出一洗萬古凡馬空  
玉花却在御榻上榻上庭前屹相向至尊含笑催賜金  
圉人太僕皆惆悵弟子韓幹早入室亦能畫馬窮殊相  
幹惟畫肉不畫骨忍使驂駟氣凋喪將軍畫善蓋有神  
必逢佳士亦寫真即今飄泊干戈際屢貌尋常行路人  
途窮反遭俗眼白世上未有如公貧但看古來盛名下  
終日坎壈纏其身

起筆老橫開元之中以下叙昔日之遇正為末段反照

丹青之妙見贈言之義明矣通篇瀏灑頓挫節奏之妙於斯為極

許顛曰老杜丹青引一洗萬古凡馬空東坡觀吳道子畫壁詩筆所未到氣已吞二公之詩足以當之

沈德潛曰畫人畫馬賓主相形縱橫跌宕此種篇法得之於心應之於手有化工而無人力莫能贊歎其妙

發閨中

前有毒蛇後猛虎溪行盡日無村塢江風蕭蕭雲拂地  
山木慘慘天欲雨女病妻憂歸意速秋花錦石誰復數  
別家三月一得書避地何時免愁苦

寄韓諫議

今我不樂思岳陽身欲奮飛病在牀美人娟娟隔秋水  
濯足洞庭望八荒鴻飛冥冥日月白青楓葉赤天雨霜  
玉京羣帝集北斗或騎騏驎翳鳳凰芙蓉旌旗煙霧樂  
影動倒景搖瀟湘星宮之君醉瓊漿羽人稀少不在旁



似聞昨者赤松子恐是漢代韓張良昔隨劉氏定長安  
帷幄未改神慘傷國家成敗吾豈敢色難腥腐餐風香  
周南留滯古所惜南極老人應壽昌美人胡為隔秋水  
焉得置之貢玉堂

黃生曰朱鶴齡謂此詩欲韓貢李泌於玉堂者其說  
近鑿公蓋與韓有舊故作此寄之按史記索隱注云  
子房本韓之公族故曰漢代韓張良所指本自明白  
浦起龍曰源本楚騷亦近太白

憶昔

憶昔開元全盛日小邑猶藏萬家室稻米流脂粟米白  
公私倉廩俱豐實九州道路無豺虎遠行不勞吉日出  
齊紈魯縞車班班男耕女桑不相失宮中聖人奏雲門  
天下朋友皆膠漆百餘年間未災變叔孫禮樂蕭何律  
豈聞一絹直萬錢有田種穀今流血洛陽宮殿燒焚盡  
宗廟新除狐兔穴傷心不忍問耆舊復恐初從亂離說  
小臣魯鈍無所能朝廷記識蒙祿秩周宣中興望我皇

灑血江漢身衰疾

居然變雅治亂相形極其沉痛

王嗣奭曰百餘年間二句蓋言法度之存亡關乎國家之理亂先叙此二語隨用豈聞二字轉下如快馬騫澗何等筆力

仇兆鰲曰明皇當豐亨豫大時忽盈虛消息之理致開元變為天寶流禍兩朝而亂猶未已此詩於理亂興亡之故反覆痛陳蓋亟望代宗撥亂反治復見開

元之盛馬

冬狩行

原注時梓州刺史章彞  
兼侍御史留後東川

君不見東川節度兵馬雄校獵亦似觀成功夜發猛士  
三千人清晨合圍步驟同禽獸已斃十七八殺聲落日  
迴蒼穹幕前生致九青兕駝畠危垂玄熊東西南北  
百里間髣髴蹴踏寒山空有鳥名鸚鵡力不能高飛逐  
走蓬肉味不足登鼎俎何為見羈虞羅中春蒐冬狩侯  
得同使君五馬一馬驄况今攝行大將權號令頗有前

賢風飄然時危一老翁十年厭見旌旗紅喜君士卒甚  
整肅為我迴轡擒西戎草中狐兔盡何益天子不在咸  
陽宮朝廷雖無幽王禍得不哀痛塵再蒙嗚呼得不哀  
痛塵再蒙

大義凜然及今誦之如見其壯顏毅色

申涵光曰草中狐兔盡何益二句即賈生不獵猛敵  
而獵禽獸意

王洙曰代宗在陝詔徵天下兵時程元振用事無一

人應詔者故章末感激言之

別唐十五誠因寄禮部賈侍郎

九載一相逢百年能幾何復為萬里別送子山之阿白  
鶴久同林潛魚本同河未知棲集期衰老強高歌歌罷  
兩悽惻六龍忽蹉跎相視髮皓白况難駐羲和胡星墜  
燕地漢將仍橫戈蕭條四海內人少豺虎多少人慎莫  
投多虎信所過饑有易子食獸猶畏虞羅子負經濟才  
天門鬱嵯峨飄飄適東周來往若崩波南宮吾故人白

馬金盤陀雄筆映千古見賢心靡他念子善師事歲寒  
守舊柯為吾謝賈公病肺卧江沱

梅堯臣曰饑有易子食二語含蓄甚深殆不可模倣  
閩山歌

閩州城東靈山白閩州城北玉臺碧松浮欲盡不盡雲  
江動將崩未崩石那知根無鬼神會已覺氣與蒿華敵  
中原格鬪且未歸應結茅齋看青壁

閩水歌

嘉陵江色何所似石黛碧玉相因依  
正憐日破浪花出更復春從沙際歸  
巴童蕩槳敲側過水雞銜魚來去飛  
閣中勝事可腸斷閬州城南天下稀

二詩著語竒秀覺空翠撲人冲襟相照

草堂

昔我去草堂蠻夷塞成都今我歸草堂成都適無虞  
請陳初亂時反覆乃須臾大將赴朝廷羣小起異圖  
中宵斬白馬盟歆氣已麤西取邛南兵北斷劔閣隅  
布衣數



十人亦擁專城居其勢不兩大始聞蕃漢殊西卒却倒

戈賊臣互相誅焉知肘腋禍自及梟鏡徒義士皆痛憤

紀綱亂相踰一國實三公萬人欲為魚唱和作威福孰

肯辨無辜眼前列杻械背後吹笙竽談笑行殺戮濺血

滿長衢到今用鉞地風雨聞號呼鬼妾與鬼馬色悲充

爾娛國家法令在此又足驚吁賤子且奔走三年望東

吳弧矢暗江海難為遊五湖不忍竟舍此復來雜榛蕪

入門四松在步屨萬竹疎舊犬喜我歸低徊入衣裾鄰

舍喜我歸沽酒攜胡蘆大官喜我來遣騎問所須城郭  
喜我來賓客隘村墟天下尚未寧健兒勝腐儒飄颻風  
塵際何地置老夫於時見疣贅骨髓幸未枯飲啄媿殘  
生食薇不敢餘

記離亂事可補史氏之闕

朱鶴齡曰寶應元年四月嚴武入朝七月劍南西川  
節度使徐知道反八月伏誅公攜家避亂往梓州廣  
德二年武鎮劍南公復還成都草堂此詩云大將赴

朝廷羣小起異圖謂武入朝而知道反也北斷劔閣  
隅謂知道以兵守要害武不得出也賊臣互相誅謂  
知道為其下李忠厚所殺也

太子張舍人遺織成褥段

客從西北來遺我翠織成開絨風濤湧中有掉尾鯨透  
迤羅水族瑣細不足名客云充君褥承君終宴榮空堂  
魑魅走高枕形神清領客珍重意顧我非公卿留之懼  
不祥施之混柴荆服飾定尊卑大哉萬古程今我一賤

老衲褐更無營煌煌珠宮物寢處禍所嬰歎息當路子  
干戈尚縱橫掌握有權柄衣馬自肥輕李鼎死岐陽實  
以驕貴盈來瑱賜自盡氣豪直阻兵皆聞黃金多坐見  
悔吝生柰何田舍翁受此厚貺情錦鯨卷還客始覺心  
和平振我麤席塵媿客茹藜羹

因小見大殊有關於典制足以正人心而厚風俗

朱鶴齡曰史稱嚴武累年在蜀肆志逞欲恣行猛政  
窮極奢靡賞賜無度公在武幕下作此諷諭至舉李

鼎來瑱以深戒之朋友責善之道也不然辭一織成  
之遺而侈談殺身自盡之禍無病而呻豈詩人之意  
乎

杜鵑

西川有杜鵑東川無杜鵑涪萬無杜鵑雲安有杜鵑我  
昔遊錦城結廬錦水邊有竹一頃餘喬木上參天杜鵑  
暮春至哀哀叫其間我見常再拜重是古帝魂生子百  
鳥巢百鳥不敢嗔仍為餒其子禮若奉至尊鴻雁及羔

羊有禮太古前行飛與跪乳識序如知恩聖賢古法則  
付與後世傳君看禽鳥情猶解事杜鵑今忽暮春間值  
我病經年身病不能拜淚下如迸泉

古調微辭集中題凡再見知其寄慨者深矣其集外一  
篇則偽也至於發端四語不闕詩之工拙謂必如是乃  
合樂府亦固哉之論

王士祿曰興觀羣怨讀此慨然有得

客堂

憶昨離少城而今異楚蜀舍舟復深山窅窅一林麓棲  
泊雲安縣消中內相毒舊疾廿載來衰年得無足死為  
殊方鬼頭白兔短促老馬終望雲南鴈意在北別家長  
兒女欲起慚筋力客堂叙節改具物對羈束石暄蕨芽  
紫渚秀蘆笋綠巴鷺紛未稀徼麥早向熟悠悠日動江  
漠漠春辭木臺郎選才俊自顧亦已極前輩聲名人埋  
沒何所得居然綰章紱受性本幽獨平生憇息地必種  
數竿竹事業只濁醪營葺但草屋上公有記者累奏資

薄祿主憂豈濟時身遠彌曠職循文廟算正獻可天衢  
直尚想趨朝廷毫髮裨社稷形骸今若是進退委行色  
水閣朝霽奉簡嚴雲安

東城抱春岑江閣鄰石面崔嵬晨雲白朝旭射芳甸雨  
檻卧花叢風床展書卷鈎簾宿鷺起丸藥流鶯轉呼婢  
取酒壺續兒誦文選晚交嚴明府矧此數相見

選體青山捫蝨坐黃鳥抱書眠極力追擬去之彌遠

蔡天啓曰荆公每稱老杜鈎簾宿鷺起丸藥流鶯轉



以為用意高妙五字模楷

蠶穀行

天下郡國向萬城無有一城無甲兵焉得鑄甲作農器  
一寸荒田牛得耕牛盡耕蠶亦成不勞烈士淚滂沱男  
穀女絲行復歌  
有慨乎其言之

古柏行

孔明廟前有老栢柯如青銅根如石霜皮溜雨四十圍

黛色參天二千尺君臣已與時際會樹木猶為人愛惜  
雲來氣接巫峽長月出寒通雪山白憶昨路遶錦亭東  
先主武侯同閔宮崔嵬枝幹郊原古窈窕丹青戶牖空  
落落盤踞雖得地冥冥孤高多烈風扶持自是神明力  
正直原因造化功大厦如傾要梁棟萬牛迴首丘山重  
不露文章世已驚未辭剪伐誰能送苦心豈免容螻蟻  
香葉終經宿鸞鳳志士幽人莫怨嗟古來材大難為用  
情深文明眼空筆老千載而下如聞太息之聲

王嗣奭曰公生平極贊孔明蓋竊比之意孔明才大而  
不盡其用公嘗自比稷契而人莫之用故篇終結  
出才大難用此作詩本旨發興於古柏者也

李因篤曰武侯廟柏自不得作一細語如太史公用  
尚書為本紀厚重乃爾

縛雞行

小奴縛雞向市賣雞被縛急相喧爭家中厭雞食蟲蟻  
不知雞賣還遭烹蟲雞於人何厚薄吾叱奴人解其縛

雞蟲得失無了時注目寒江倚山閣

齊物之旨

師厚曰天下利害當權輕重除寇則勞民愛民則養  
寇與其養寇孰若勞民與其惜蟲孰若存雞此論聖  
人不易天下亦無難處之事始知浮屠法不可治世  
蔡正孫曰步里客談云古人作詩斷句輒旁入他意  
最為警策如老杜云雞蟲得失無了時注目寒江倚  
山閣是也黃魯直作水仙花詩坐對真成被花惱出

門一笑大江橫亦是此意

牽牛織女

牽牛出河西織女處其東萬古永相望七夕誰見同神  
光意難候此事終蒙矚然精靈合何必秋遂通亭亭  
新粧立龍駕具曾空世人亦為爾祈請走兒童稱家隨  
豐儉白屋達公宮膳夫翊堂殿鳴玉淒房櫳曝衣遍天  
下曳月揚微風蛛絲小人態曲綴瓜果中初筵滾重露  
日出甘所終嗟汝未嫁女秉心鬱忡忡防身動如律竭

力機杼中雖無姑舅事敢昧織作功明明君臣契咫尺  
或未容義無棄禮法恩始夫婦恭小大有佳期戒之在  
至公方圓苟齟齬丈夫多英雄

借題發議正而不腐起處作疑詞李商隱七夕詩所自  
出也

張綆曰易言物不可以苟合故借牛女無私會之事  
以興男女無苟合之道又因男女無苟合之道以比  
君臣無苟合之義觸類旁通高古嚴正可見古作詩

者之意

殿中楊監見示張旭草書圖

斯人已云亡草聖秘難得及茲煩見示滿目一淒惻悲  
風生微綃萬里起古色鏘鏘鳴玉動落落羣松直連山  
蟠其間溟漲與筆力有練實先書臨池真盡墨俊拔為  
之主暮年思轉極未知張王後誰並百代則嗚呼東吳  
精逸氣感清識楊公拂篋竒舒卷忘寢食念昔揮毫端  
不獨觀酒德

形容草書奇語獨造

朱鶴齡曰李頎贈張顛詩云皓首窮草隸時稱太湖  
精

課伐木 并序

課隸人伯夷幸秀信行等入谷斬陰木人日四根止  
維條伊枚正直挺然晨征暮返委積庭內我有藩籬  
是缺是補載伐篠蕩伊仗支持則旅次於小安山有  
虎知禁若恃爪牙之利必昏黑檜突夔人屋壁列樹



白菊鏝為墻實以竹示式過為與虎近混淪乎無良  
賓客憂害馬之徒苟活為幸可嘿息已作詩示宗武  
誦

長憂無所為客居課奴僕清晨飯其腹持斧入白谷青  
冥曾巔後十里斬陰木人肩四根已亭午下山麓尚聞  
丁丁聲功課日各足蒼皮成委積素節相照燭藉汝跨  
小籬堂仗若虛竹空荒咆熊羆乳獸待人肉不示知禁  
情豈惟干戈哭城中賢府主處貴如白屋蕭蕭理體淨

蜂蠱不敢毒虎穴連里閭隄防舊風俗泊舟滄江岸久  
客慎所觸舍西崖嶠壯雷雨蔚含蓄墻宇資屢脩哀年  
怯幽獨爾曹輕執熟為我忍煩促秋光近青岑季月當  
泛菊報之以微寒共給酒一斛

槐葉冷淘

青青高槐葉采掇付中厨新麪來近市汁滓宛相俱入  
鼎資過熟加餐愁欲無碧鮮俱照筯香飯兼苞蘆經齒  
冷於雪勸人投比珠願隨金騾裹走置錦屠蘇路遠思

恐泥興深終不渝獻芹則小小薦藻明區區萬里露寒  
殿開水清玉壺君王納涼晚此味亦時須  
隨事徵其忠款所謂一飯不忘君者信然

朱子語錄曰文字好用經語亦一病東坡寫此詩至  
路遠思恐泥云此不足為法

行官張望補稻畦水歸

東屯大江北百頃平若按六月青稻多千畦碧泉亂插  
秧適云已引溜加溉灌更僕往方塘決渠當斷岸公私

各地著浸潤無天旱主守問家臣分明見溪畔芊芊炯  
翠羽剡剡生銀漢鷗鳥鏡裏來關山雪邊看秋菰成黑  
米精鑿傳白粲玉粒足晨炊紅鮮任霞散終然添旅食  
作苦期壯觀遺穗及衆多我倉戒滋蔓

黃生曰杜田園諸詩覺有傲睨陶公之色其氣力沈  
雄骨格蒼勁本色自不可掩

上後園山脚

朱夏熱所嬰清旭步北林小園背高岡挽葛上崎峯曠

望延駐目飄颻散疎襟潛鱗恨水壯去翼依雲深勿謂  
地無疆劣於山有陰石楝遍天下水陸兼浮沉自我登  
隴首十年經碧岑劔門來巫峽薄倚浩至今故園暗戎  
馬骨肉失追尋時危無消息老去多歸心志士惜白日  
久客藉黃金敢為蘇門嘯庶作梁父吟

杜田曰楝音原木名皮可食或云善本止是石原

驅豎子摘蒼耳

江上秋已分林中瘴猶劇畦丁告勞苦無以供日夕蓬

莠獨不焦野蔬暗泉石卷耳况療風童兒且時摘侵星  
驅之去爛漫任遠適放筐亭午際洗剝相蒙冪登牀半  
生熟下筯還小益加點瓜薤間依稀橘奴跡亂世誅求  
急黎民糠粃窄飽食復何心荒哉膏梁客富家厨肉臭  
戰地骸骨白寄語惡少年黃金且休擲

仇兆鰲曰膏梁徒飽而黎民苦饑傷在居人富家食  
肉而戰場暴骨傷及征夫此嘆物力之宜惜也

秋行官張望督促東渚耗稻向畢清晨遣女奴阿

稽豎子阿段往問

東渚雨今足，佇聞粳稻香。上天無偏頗，蒲稗各自長。人情見非類，田家戒其荒。功夫競楫楫，除草置岸旁。穀者命之本，客居安可忘。青春具所務，勤墾免亂常。吳牛力容易，並驅動莫當。豐苗亦已概，雲水照方塘。有生固蔓延，靜一資隄防。督領不無人，提攜頗在綱。荆揚風土暖，肅肅候微霜。尚恐主守疎，用心未甚臧。清朝遣婢僕，寄語踰崇岡。西成聚必散，不獨陵我倉。豈要仁里譽，感此

亂世忙北風吹蒹葭蟋蟀近中堂荏苒百工休鬱紆遲  
暮傷

御選唐宋詩醇卷十一





總校官庶吉士臣張能照

校對官中書臣王鍾泰

謄錄貢生臣趙希濬

欽定四庫全書薈要

集部

御選唐宋詩醇卷十二



詳校官原任字亭<sub>臣</sub>李斯咏

欽定四庫全書薈要

御選唐宋詩醇卷十二

襄陽杜甫詩四

目錄

雨

又上後園山脚

種蒿苳

八哀詩



贈司空王公思禮

故司徒李公光弼

贈左僕射鄭國公嚴公武

贈太子太師汝陽郡王璿

贈秘書監江夏李公邕

故秘書少監武功蘇公源明

故著作郎貶台州司戶榮陽鄭公虔

故右僕射相國張公九齡

寫懷

觀公孫大娘弟子舞劍器行

同元使君春陵行

李潮八分小篆歌

聽楊氏歌

荆南兵馬使太常卿趙公大食刀歌

王兵馬使二角鷹

狄明府

秋風二首

虎牙行

後苦寒行二首

夜歸

醉為馬墜諸公攜酒相看

大覺高僧蘭若

宿青溪驛奉懷張員外十五兄之緒

憶昔行

魏將軍歌

北風

白鳧行

醉歌行贈公安顏少府請顧八題壁

夜聞鶯窠

發劉郎浦

別董頴

送顧八分文學適洪吉州

遣遇

解憂

宿鑿石浦

過津口

次空靈岸

宿花石戍

望嶽

岳麓山道林二寺行



歲晏行

追酬故高蜀州人日見寄

蘇大侍御訪江浦賦八韻紀異

題衡山縣文宣王廟新學堂呈陸宰

御選唐宋詩醇卷十二目錄

欽定四庫全書薈要卷一萬九千三百三十六集部

御選唐宋詩醇卷十二

襄陽杜甫詩四

雨

空山中宵陰微冷先枕席迴風起清曙萬象萋已碧落  
落出岫雲渾渾倚天石日假何道行雨含長江白連檣  
荊州船有士荷矛戟南防草鎮慘霑濕赴遠役羣盜下  
辟山總戎備強敵水深雲光廓鳴櫓各有適漁艇息悠

金 日 人 二  
卷 十 二  
悠夷歌負樵客留滯一老翁書時記朝夕

王嗣奭曰公憂旱詩云上天鑠金石羣盜亂豺虎今  
雖得雨而復憂盜上一章憂吳楚之盜故恐遠客難  
行此章憂峽中之盜故憐士卒勞役

又上後園山脚

昔我遊山東憶戲東嶽陽窮秋立日觀矯首望八荒朱  
崖著毫髮碧海吹衣裳蓐收困用事玄冥蔚強梁逝水  
自朝宗鎮名各其方平原獨憔悴農力廢耕桑非關風

露凋曾是戍役傷於時國用富足以守邊疆朝廷任猛  
將遠奪戎敵場到今事反覆故老淚萬行龜蒙不復見  
况乃懷舊鄉肺萎屬久戰骨出熱中腸憂來仗匣劔更  
上林北岡瘴毒猿鳥落峽乾南日黃秋風亦已起江漢  
始如湯登高欲有往蕩析川無梁哀彼遠征人去家死  
路旁不及祖父塋纍纍塚相當

劉會孟曰情緒闊遠收拾悲慟

種蒿苳

并序

既雨已秋堂下理小畦隔種一兩席許蒿苳向二旬  
矣而苳不甲坼獨野覓青青傷時君子或晚得微祿  
輶軻不進因作此詩

陰陽一錯亂驕蹇不復理枯旱於其中炎方慘如燬植  
物半蹉跎嘉生將已矣雲雷歛奔命師伯集所使指麾  
赤白日頽洞青光起雨聲先已風散足盡西靡山泉落  
滄江霹靂猶在耳終朝紆颯沓信宿罷瀟灑堂下可以  
畦呼童對經始苳兮蔬之常隨事執其子破塊數席間

荷鋤功易止兩旬不甲坼空惜埋泥滓野覓迷汝來宗  
生實於此此輩豈無秋亦蒙寒露委翻然出地速滋蔓  
戶庭毀因知邪干正掩抑至沒齒賢良雖得祿守道不  
封已擁塞敗芝蘭衆多盛荆杞中園陷蕭艾老圃永為  
恥登於白玉盤藉以如霞綺覓也無所施胡顏入筐篚  
以上諸篇皆羈旅無聊中即景遣懷紀細事寫憂心而  
已然規模既大波瀾自遠每一篇中莫不俯仰今昔推  
通物理言近而指則遠語質而思則深論者所云不作

諸家細碎詩也劉勰云人稟七情應物斯感感物吟志  
莫非自然此之諸篇殆亦自然流露者矣故能藏風韻  
於荒涼寓高華於懇朴若儲王田家詩但寫情景當別  
有位置不可與此並論

高元之曰自古工詩者未嘗無興也覩物有感則有  
興今之作詩以興近乎詛也故不敢作而詩之一義  
廢矣杜萑苳詩皆興小人盛而掩抑君子也高適題  
處士園云耕地桑柘間地肥菜常熟為問葵藿資何



如廟堂肉則近乎訕矣作詩者知興之與訕異殆可與言詩

浦起龍曰當與菁莪卷伯諸詩並讀人知好前後出塞三吏三別等篇不知好此種彼為漢魏之後勁此為風雅之希聲

八哀詩

并序

傷時盜賊未息興起王公李公歎舊懷賢終於張相國八公前後存沒遂不詮次焉

贈司空王公思禮

司空出東夷童稚刷勁翮  
追隨燕薊兒穎銳物不隔服  
事哥舒翰意無流沙磧未甚拔  
行間犬戎大充斥短小  
精悍姿屹然強寇敵貫穿百萬衆  
出入由咫尺馬鞍懸  
將首甲外控鳴鏑洗劍青海水  
刻銘天山石九曲非外  
蕃其王轉深壁飛兔不近駕  
鷲鳥資遠擊曉達兵家流  
飽聞春秋癖胸襟日沉靜  
肅肅自有適潼關初潰散萬  
乘猶辟易偏裨無所施  
元帥見手格太子入朔方至尊

狩梁益胡馬纏伊洛中原氣甚逆肅宗登寶位塞望勢

敦迫公時徒步至請罪將厚責際會清河公間道傳玉

冊天王拜跪畢謹議果冰釋翠華卷飛雪熊虎亘阡陌

屯兵鳳凰山帳殿涇渭闢金城賊咽喉詔鎮雄所搯禁

暴清無雙爽氣春浙瀝巷有從公歌野多青青麥及夫

哭廟後復領太原役恐懼祿位高悵望王土窄不得見

清時嗚呼就窀穸永繫五湖舟悲甚田橫客千秋汾晉

間事與雲水白昔觀文苑傳豈述廉蔭績嗟嗟鄧大夫

士卒終倒戟

故司徒李公光弼

司徒天寶末北收晉陽甲胡騎攻吾城愁寂意不愜人  
安若泰山薊北斷右脅朔方氣乃蘇黎首見帝業二宮  
泣西郊九廟起顏壓未散河陽卒思明僞臣妾復自碣  
石來火焚乾坤獵高視笑祿山公又大獻捷異王冊崇  
勲小敵信所怯擁兵鎮河汴千里初妥帖青蠅紛營營  
風雨秋一葉內省未入朝死淚終映曉大屋去高棟長

城掃遺堞平生白羽扇零落蛟龍匣雅望與英姿惻愴  
槐里接三軍晦光彩烈士痛稠疊直筆在史臣將來洗  
箱篋吾思哭孤冢南紀阻歸楫扶顛永蕭條未濟失利  
涉疲菴竟何人洒涕巴東峽

王李名將實為起興所由李功業尤隆二篇氣魄沉摯  
最為精彩

劉克莊曰語極悲壯其形容臨淮憂謫畏譏不敢入  
朝之意獨見分曉

贈左僕射鄭國公嚴公武

鄭公瑚璉器華岳金天晶昔在童子日已聞老成名嶷  
然大賢後復見秀骨清開口取將相小心事友生閱書  
百紙盡落筆四座驚歷職匪父任嫉邪常力爭漢儀尚  
整肅胡騎忽縱橫飛傳自河隴逢人問公卿不知萬乘  
出雪涕風悲鳴受詞劔閣道謁帝蕭關城寂寞雲臺仗  
飄颻沙塞旌江山少使者笳鼓凝皇情壯士血相視忠  
臣氣不平密論貞觀體揮發岐陽征感激動四極聯翩

收二京西郊牛酒再原廟丹青明匡汲俄寵辱衛霍竟  
哀榮四登會府地三掌華陽兵京兆空柳色尚書無履  
聲羣鳥自朝夕白馬休橫行諸葛蜀人愛文翁儒化成  
公來雪山重公去雪山輕記室得何遜韜鈴延子荆四  
郊失壁壘虛館開逢迎堂上指圖畫軍中吹玉笙豈無  
成都酒憂國只細傾時觀錦水釣問俗終相并意待犬  
戎滅人藏紅粟盈以茲報主願庶或禪世程炯炯一心  
在沉沉二豎嬰顏回竟短折賈誼徒忠貞飛旒出江漢

孤舟轉荆衡虛無馬融笛悵望龍驤瑩空餘老賓客身  
上愧簪纓

嚴武鎮蜀雖多不法然在蜀而蜀安去蜀而蜀危以其  
去來為輕重則道其實也且武於甫最為知己故極寫  
其忠勤大畧諸將詩云軍令分明數舉杯亦同此意

贈太子太師汝陽郡王璿

汝陽讓帝子眉宇真天人虬鬚似太宗色映塞外春往  
者開元中主恩視遇頻出入獨非時禮異見羣臣愛其



謹潔極倍此骨肉親從容聽朝後或在風雪晨忽思格

猛獸苑囿騰清塵羽旗動若一萬馬肅駘駘詔王來射

雁拜命已挺身箭出飛鞚內上又回翠麟翻然紫塞翻

下拂明月輪胡人雖獲多天笑不為新王每中一物手

自與金銀袖中諫獵書扣馬久上陳竟無銜緊虞聖聰

矧多仁官免供給費水有在藻鱗匪唯帝老大皆是王

忠勤晚年務置醴門引申白賓道大容無能永懷侍芳

茵好學尚貞烈義形必需巾揮翰綺繡揚篇什若有神

川廣不可泝墓久狐兔鄰宛彼漢中郡文雅見天倫何  
以開我悲泛舟俱遠津温温昔風味少壯已書紳舊遊  
易磨滅衰謝增酸辛

贈秘書監江夏李公邕

長嘯宇宙間高才日陵替古人不可見前輩復誰繼憶  
昔李公存詞林有根柢聲華當健筆灑落富清製風流  
散金石追琢山岳銳情窮造化理學貫天人際干謁走  
其門碑版照四裔各滿深望還森然起凡例蕭蕭白楊

路洞徹寶珠惠龍宮塔廟湧浩劫浮雲衛宗儒俎豆事  
故吏去思計眇眇已皆虛跋涉曾不泥向來映當時豈  
獨勸後世豐屋珊瑚鈎騏驎織成蜀紫騮隨劔几義取  
無虛歲分宅脫驂間感激懷未濟衆歸調給美擺落多  
藏穢獨步四十年風聽九臯唳嗚呼江夏姿竟掩宣尼  
袂往者武后朝引用多寵嬖否臧太常議面折二張勢  
衰俗凜生風排蕩秋旻霽忠貞負冤恨宮闕深旒綴放  
逐早聯翩低垂困炎厲日斜鵬鳥入魂斷蒼梧帝榮枯

走不暇星駕無安稅幾分漢廷竹夙擁文侯簞終悲洛

陽獄事近小臣敝禍階初負謗易力何深濟伊昔臨淄

亭酒酣托末契重叙東都別朝陰改軒砌論文到崔蘇

指盡流水逝近伏盈川雄未甘特進麗是非張相國相

扼一危脆爭名古豈然關鍵歛不閉例及吾家詩曠懷

掃氛翳慷慨嗣真作咨嗟玉山桂鍾律儼高懸鯤鯨噴

迢遞坡陀青州血蕪沒汶陽瘞哀贈竟蕭條恩波延揭

厲子孫存如綫舊客舟凝滯君臣尚論兵將帥接燕薊

朗咏六公篇憂來豁蒙蔽

仇兆鰲曰各章以序事成文部署森嚴純似班史惟此章感慨激昂排蕩變化直追龍門之筆細按其前後段落又未嘗不脉絡整齊也

故秘書少監武功蘇公源明

武功少也孤徒步客徐究讀書東岳中十載考墳典時下萊蕪郭忍飢浮雲巘負米晚為身每食臉必泣夜字照爇薪垢衣生碧蘚庶以勤苦志報茲勛勞顯學蔚醇

儒姿文包舊史善灑落辭幽人歸來潛京輦射君東堂

策宗匠集精選制可題未乾乙科已大闡文章日自負  
吏祿亦累踐晨趨閭闔內足踏宿昔趼一麾出守還黃  
屋朔風卷不暇陪八駿遠方悲所遣平生滿樽酒斷此  
朋知展憂憤病二秋有恨石可轉肅宗復社稷得無逆  
順辨范曄顧其兒李斯憶黃犬秘書茂松意溟漲本末  
淺青熒芙蓉劔犀兕豈獨剗反為後輩褻予實苦懷緬  
煌煌齋房芝事絕萬手奪垂之俟來者正始徵勸勉不

要懸黃金胡為投乳贖結交三十載吾與誰遊行滎陽  
復冥冥罪罟已橫眉嗚呼子逝日始泰則終蹇長安米  
萬錢凋喪盡餘喘戰伐何當解歸帆阻清沔尚纏漳水  
疾永負蒿里錢

故著作郎貶台州司戶滎陽鄭公虔

鷄鷓至魯門不識鐘鼓饗孔翠望赤霄愁思雕籠養滎

陽冠衆儒早聞名公賞地崇士大夫况乃氣精爽

原注  
往者

公在疾蘇許公頌位尊望重素未相識早愛  
才名躬自撫問後結忘年之契遠邇嘉之  
天然生知

姿學立游夏上神農極闕漏黃石愧師長藥纂西極名

原注公著蒼叢等諸書之外又撰胡本草七卷

兵流指諸掌貫穿無遺恨蒼叢

何技癢圭臬星經奧蟲篆丹青廣子雲窺未遍方朔諧

太枉神翰顧不一體變鍾兼兩文傳天下口大字猶在

膀昔獻書畫圖新詩亦俱往滄洲動玉陛寡鶴誤一響

三絕自御題四方尤所仰嗜酒益疎放彈琴視天壤形

骸實土木親近唯几杖未曾寄官曹突兀倚書幌晚就

芸香閣胡塵昏垓莽反覆歸聖朝點染無滌盪老蒙台



州椽泛泛浙江槩履穿四明雪飢拾楮溪椽空聞紫芝  
歌不見杏壇丈天長跳東南秋色餘魍魎別離慘至今  
斑白徒懷曩春深秦山秀葉墜清渭朗劇談王公門野  
稅林下鞅操紙終夕酣時物集遐想詞場竟疎闊平昔  
濫吹獎百年見存沒牢落吾安放蕭條阮咸在出處同  
世網他日訪江樓含悽述飄蕩

原注著作與今私書監  
鄭君審篇翰齋價謫江

陵故有阮咸  
江樓之句

王士禎曰百年見存沒牢落吾安放十字悲甚

故右僕射相國張公九齡

相國生南紀金璞無留礦仙鶴下人間獨立霜毛整矯  
然江海思復與雲路永寂寞想土階未遑等箕穎上君  
白玉堂倚君金華省碣石歲崢嶸天地日蛙黽退食吟  
大庭何心記榛梗骨驚畏曩哲鬢變負人境雖蒙換蟬  
冠右地慙多幸敢忘二疏歸痛迫蘇耽井紫綬映暮年  
荊州謝所領庾公興不淺黃霸鎮每靜賓客引調同諷  
詠在務屏詩罷地有餘篇終語清省一陽發陰管淑氣

含公鼎乃知君子心用才文章境散帙起翠螭倚薄巫  
廬並綺麗玄暉擁牋誅任昉騁自我一家則未缺隻字  
警千秋滄海南名繫朱鳥影歸老守故林戀闕悄延頸  
波濤良史筆蕪絕大庾嶺向時禮數隔制作難上請再  
讀徐孺碑猶思理烟艇

子美八哀自是鉅篇然以韻語作敘述情緒既繁筆墨  
不無利鈍大家之文正如黃河之水滔滔莽莽魚龍砂  
石與流俱下非如沼沚之觀清泠可喜而已論此詩者

譽之或過其實毀之或損其真惟盧世澐曰八哀詩未免傷煩傷汎然詩家之元氣在焉杜詩之體統存焉不可遺亦不容選斯言得之

劉克莊曰八哀詩崔德符謂可以表裏雅頌中古作者莫及韓子蒼謂其筆力變化當與太史公諸贊方駕惟葉石林謂長篇最難晉魏以前無過十韻常使人以意逆志初不以叙事顛倒為工此八篇本非集中高作而世多尊稱不敢置議其病蓋傷於多如李

邕蘇源明篇中多累句芟去方為盡善余謂韓比比  
於史公紀傳固不易之論至於石林之評累句為長  
篇者亦不可不知

寫懷

勞生共乾坤何處異風俗冉冉自趨競行行見羈束無  
貴賤不悲無富貧亦足萬古一骸骨鄰家遞歌哭鄙夫  
到巫峽三歲如轉燭全命甘留滯忘情任榮辱朝班及  
暮齒日給還脫粟編蓬石城東採藥山北谷用心霜雪

間不必條蔓綠非關故安排曾是順幽獨達士如弦直  
小人似鈎曲曲直我不知負暄候樵牧

貌古心遠見道之言非關矯語

觀公孫大娘弟子舞劍器行

并序

大曆二年十月十九日夔府別駕元持宅見臨穎李  
十二娘舞劍器壯其蔚跂問其所師曰余公孫大娘  
弟子也開元三載余尚童穉記於郾城觀公孫氏舞  
劍器渾脫瀏漓頓挫獨出冠時自高頭宜春梨園二

伎坊內人洎外供奉曉是舞者聖文神武皇帝初公  
孫一人而已玉貌錦衣况余白首今茲弟子亦非盛  
顏既辨其由來知波瀾莫二撫事慷慨聊為劔器行  
往者吳人張旭善草書書帖數常於鄴縣見公孫大  
娘舞西河劔器自此草書長進豪蕩感激即公孫可  
知矣

昔有佳人公孫氏一舞劔器動四方觀者如山色沮喪  
天地為之久低昂燿如羿射九日落矯如羣帝驂龍翔

來如雷霆收震怒，罷如江海凝清光。  
絳唇珠袖兩寂寞，況有弟子傳芬芳。  
芳臨穎美人在白帝，妙舞此曲神揚揚。  
與余問答既有以，感時撫事增惋傷。  
先帝侍女八千人，公孫劔器初第一。  
五十年間似反掌，風塵瀕洞昏王室。  
梨園子弟散如烟，女樂餘姿映寒日。  
金粟堆南木已拱，瞿塘石城草蕭瑟。  
玳筵急管曲復終，樂極哀來月東出。  
老夫不知其所往，足繭荒山轉愁疾。

前如山之嶙峋，後如海之波瀾。  
前半極其濃，至後半感。



嘆音響一何悲絃急知柱促也

劉克莊曰此篇與琵琶行一如壯士軒昂赴敵場一  
如兒女恩怨相爾汝

王嗣奭曰此見舞劍器而傷往事全是為開元天寶  
五十年間治亂興衰而發

王士禎曰陳暘樂書云樂府諸曲自古不用犯聲自  
則天末年劍器入渾脫為犯聲之始劍器宮調渾脫  
商調以臣犯君故為犯聲又唐多用解曲如柘枝用

渾脫解之類觀此則劔器渾脫各為舞曲之名今人  
誤讀杜序以渾脫瀏澦頓挫六字為句文字中往往  
連綴用之可笑也

同元使君春陵行

并序

覽道州元使君結春陵行兼賊退後示官吏作二首  
志之曰當天子分憂之地效漢官良吏之目今盜賊  
未息知民疾苦得結輩十數公落落然參錯天下為  
邦伯萬物吐氣天下少安可得矣不意復見比興體

制微婉頓挫之詞感而有詩增諸卷軸簡知我者不  
必寄元

遭亂髮盡白轉衰病相嬰沉綿盜賊際狼狽江漢行歎  
時藥力薄為客羸瘵成吾人詩家秀博采世上名粲粲  
元道州前聖畏後生觀乎春陵作歛見俊哲情復覽賊  
退篇結也實國楨賈誼昔流勸匡衡常引經道州憂黎  
庶詞氣浩縱橫兩章對秋月一字偕華星致君唐虞際  
純樸憶大庭何時降璽書用爾為丹青獄訟永衰息豈

唯偃甲兵悽惻念誅求薄斂近休明乃知正人意不苟  
飛長纓涼飈振南岳之子寵若驚色阻金印大興含滄  
浪清我多長卿病日夕思朝廷肺枯渴太甚漂泊公孫  
城呼兒具紙筆隱几臨軒楹作詩呻吟內墨淡字歆傾  
感彼危苦詞庶幾知者聽

悃幅無華之吏日計不足歲計有餘不肖者橫征暴斂  
掊削元氣為民蠹賊古之賢君所以惓惓於良二千石  
也甫此篇所謂干預教化之尤者元結二詩仁者之言

可以並垂不朽

元結春陵行序云癸卯歲漫叟授道州刺史道州舊  
四萬餘戶經賊已來不滿四千大半不勝賦稅到官  
未五十日承諸使徵求符牒二百餘封皆曰失其限  
者罪至貶削於戲若悉應其命則州縣破亂刺史欲  
焉逃罪若不應命又即獲罪戾必不免也吾將守官  
靜以安人待罪而已此州是春陵故地故作春陵行  
以達下情詩曰軍國多所須切責在有司有司臨郡

縣刑法竟欲施供給豈不憂徵斂又可悲州小經亂  
亡遺人實困疲大鄉無十家大族命單羸朝飧是草  
根暮食乃樹皮出言氣欲絕意速行步遲追呼尚不  
忍况乃鞭朴之郵亭傳急符來往迹相追更無寬大  
恩但有迫促期欲令鬻兒女言發恐亂隨悉使索其  
家而又無生資聽彼道路言怨傷誰復知去冬山賊  
來殺奪幾無遺所願見王官撫養以惠慈柰何重驅  
逐不使存活為安人天子命符節吾所持州縣忽亂

亡得罪復是誰逋緩違詔令蒙責固所宜前賢重守  
分惡以禍福移亦云貴守官不愛能適時顧唯孱弱  
者正直當不虧何人採國風吾欲獻此辭又賤退示  
官吏序云癸卯歲西原賊入道州殺掠幾盡而去明  
年賊又攻永破邵不犯此州邊鄙而退豈力能制敵  
蓋蒙其傷憐而已諸使何為忍苦徵斂故作詩一篇  
以示官吏詩曰昔歲逢太平山林二十年泉源在庭  
戶洞壑當門前井稅有常期日晏猶得眠忽然遭世

變數歲親戎旃今來典斯郡山夷又紛然城小賊不  
屠人貧傷可憐是以陷鄰境此州獨見全使臣將王  
命豈不如賊焉今彼徵斂者迫之如火煎誰能絕人  
命以作時世賢思欲委符節引竿自剗船將家就魚  
菱窮老江湖邊

李潮八分小篆歌

蒼頡鳥跡既茫昧字體變化如浮雲陳倉石鼓又已訛  
大小二篆生八分秦有李斯漢蔡邕中間作者寂不聞



嶧山之碑野火焚棗木傳刻肥失真苦縣和尚骨立  
書貴瘦硬方通神惜哉李蔡不復得吾甥李潮下筆親  
尚書韓擇木騎曹蔡有鄰開元已來數八分潮也奄有  
二子成三人况潮小篆逼秦相快劍長戟森相向八分  
一字直百金蛟龍盤擎肉屈強吳郡張顛誇草書草書  
非古空雄壯豈如吾甥不流宕丞相中郎丈人行巴東  
逢李潮逾月求我歌我今衰老才力薄潮乎潮乎柰汝  
何

論書皆中肯綮坡老云杜陵評書貴瘦硬此論未公吾  
不憑特借作跌宕耳非遂不許其論也詩亦瘦硬無比

聽楊氏歌

佳人絕代歌獨立發皓齒滿堂慘不樂響下清虛裏江  
城帶素月况乃清夜起老大悲暮年壯士淚如水玉盃  
久寂寞金管迷宮徵勿云聽者疲愚智心盡死古來傑  
出土豈待一知己吾聞昔秦青傾側天下耳

荆南兵馬使太常卿趙公大食刀歌

太常樓船聲嗷嘈問兵刮寇趨下牢牧出令奔飛百艘  
猛蛟突獸紛騰逃白帝寒城駐錦袍元冬示我胡國刀  
壯士短衣頭虎毛憑軒拔鞘天為高翻風轉日木怒號  
冰翼雪淡傷哀猱鑄錯碧鬣鷓鷯膏銚鏑已瑩虛秋濤  
鬼物撇捩辭坑壕蒼水使者捫赤條龍伯國人罷釣鰲  
芮公迴首顏色勞分閫救世用賢豪趙公玉立高歌起  
攬環結佩相終始萬歲持之護天子得君亂絲與君理  
蜀江如線如針水荆岑彈丸心未已賊臣惡子休干紀

卷十二  
魑魅魍魎徒為耳妖腰亂領敢欣喜用之不高亦不庫  
不似長劍須天倚吁嗟光祿英雄弭大食寶刀聊可比  
丹青宛轉麒麟裏光芒六合無泥滓

王嗣奭曰此燕歌行變體布局既新鍊詞特異所謂  
驚人之作

王兵馬使二角鷹

悲臺蕭颯石龍從哀壑朽柯浩呼洶中有萬里之長江  
迴風滔日孤光動角鷹翻倒壯士臂將軍玉帳軒勇氣

二鷹猛腦條徐墜目如愁胡視天地杉雞竹兔不自惜  
溪虎野羊俱辟易韝上鋒稜十二翮將軍勇銳與之敵  
將軍樹勲起安西崑崙虞泉入馬蹄白羽曾肉三狡獍  
敢決豈不與之齊荆南芮公得將軍亦如角鷹下翔雲  
惡鳥飛飛啄金屋安得爾輩開其羣驅出六合梟鸞分  
以賦鷹者賦人賓主離合幾於魚龍百變眩人心目此  
與前篇皆擺脫恒蹊體格音節蒼然入古

沈德潛曰起四句不著鷹一字然如有角鷹飛於目

前入手須如此著墨

狄明府

梁公曾孫我姨弟不見十年官濟濟大賢之後竟陵遲  
浩蕩古今同一體比者叔伯四十人有才無命百僚底  
今者兄弟一百人幾人卓絕秉周禮在汝更用文章為  
長兄白眉復天啓汝門請從曾翁說太后當朝多巧詆  
狄公執政在末年濁河終不污清濟國嗣初將付諸武  
公獨廷諍守丹陛禁中決策請房陵前朝長老皆流涕

太宗社稷一朝正漢官威儀重昭洗時危始識不世才  
誰謂荼苦甘如薺汝曹又宜列土食身使門戶多旌榮  
胡為漂泊岷漢間干謁王侯頗歷抵况乃山高水有波  
秋風蕭蕭露泥泥虎之飢下巉嵒蛟之橫出清泚早歸  
來黃土泥衣眼易眯

浦起龍曰舊說此詩俱以憐狄漂零為解今觀篇尾  
一段乃與昌黎送董邵南序同意蓋博濟必不得志  
於朝而歷干藩鎮者時河北方多擅命意頗不喜其

往也

秋風二首

秋風淅淅吹巫山上牢下牢修水關吳檣楚柂牽百丈  
暖向神都寒未還要路何日罷長戟戰自青羌連百蠻  
中巴不曾消息好暝傳戍鼓長雲間

秋風淅淅吹我衣東流之外西日微天清小城擣練急  
石古細路行人稀不知明月為誰好早晚孤帆他夜歸  
會將白髮倚庭樹故園池臺今是非



洗馬言愁淒然可聽

虎牙行

秋風歛吸吹南國天地慘慘無顏色  
洞庭揚波江漢迴虎牙銅柱皆傾側  
巫峽陰岑朔漠氣峰巒窈窕豁谷黑  
杜鵑不來猿狖寒山鬼幽憂雪霜逼  
楚老長嗟憶炎瘴三尺角弓兩斛力  
壁立石城橫塞起金錯旌竿滿雲直  
漁陽突騎獵青丘犬戎鏖甲聞丹極  
八荒十年防盜賊征戍誅求寡妻哭  
遠客中宵淚霑臆

後苦寒行二首

南紀巫廬瘴不絕太古以來無尺雪蠻夷長老怨苦寒  
崑崙天關凍應折玄猿口噤不能嘯白鵠翅垂眼流血  
安得春泥補地裂

晚來江門失大木猛風中夜吹白屋天兵斬斷青海戎  
殺氣南行動地軸不爾苦寒何太酷巴東之峽生凌澌  
彼蒼回斡人得知

節短勢險別成格調

張潛曰命意用筆善於轉換

夜歸

夜來歸來衝虎過山黑家中已眠卧傍見北斗向江低  
仰看明星當空大庭前把燭嗔兩炬峽口驚猿聞一箇  
白頭老罷舞復歌杖藜不睡誰能那

醉為馬墜諸公攜酒相看

甫也諸侯老賓客罷酒酣歌拓金戟騎馬忽憶少年時  
散蹄迸落瞿塘石白帝城門水雲外低身直下八千尺

粉堞電轉紫遊韁東得平岡出天壁江村野堂爭入眼  
垂鞭蹕鞚凌紫陌向來皓首驚萬人自倚紅顏能騎射  
安知決臆追風足朱汗驂驪猶噴玉不虞一蹶終損傷  
人生快意多所辱職當憂戚伏衾枕况乃遲暮加煩促  
朋知來問腆我顏杖藜強起依僮僕語盡還成開口笑  
提攜別掃清谿曲酒肉如山又一時初筵哀絲動豪竹  
共指西日不相貸喧呼且覆盃中淥何必走馬來為問  
君不見嵇康養生遭殺戮

前有聲色後饒情致一叙一解老氣無比

大覺高僧蘭若

原注和尚去冬往湖南

巫山不見廬山遠松林蘭若秋風晚一老猶鳴日暮鐘  
諸僧尚乞齋時飯香鑪峯色隱晴湖種杏仙家近白榆  
飛錫去年啼邑子獻花何日許門徒

風調清迥頗似摩詰

宿青溪驛奉懷張員外十五兄之緒

漾舟千山內日入泊枉渚我生本飄飄今復在何許石

根青楓林猿鳥聚儔侶月明游子靜畏虎不得語中夜  
懷友朋乾坤此深阻浩蕩前後間佳期付荆楚

黃生曰此詩在杜集已為輕秀之作較諸唐賢猶見  
氣骨

憶昔行

憶昔北尋小有洞洪河怒濤過輕舸辛勤不見華蓋君  
艮岑青輝慘么麼千崖無人萬壑靜三步回頭五步坐  
秋山眼冷魂未歸仙賞心違淚交墮弟子誰依白茅室

盧老獨放青銅鎖巾拂香餘搥藥塵階除灰死燒丹火  
玄圃滄洲莽空闊金節羽衣飄婀娜落日初霞閃餘映  
倏忽東西無不可松風礮水聲合時青兕黃熊啼向我  
徒然咨嗟無遺迹至今夢想仍猶左秘訣隱文須內教  
晚歲何功使願果更討衡陽董鍊師南浮早鼓瀟湘柂

魏將軍歌

將軍昔著從事衫鐵馬馳突重兩銜被堅執銳畧西極  
崑崙月窟東嶄巖君門羽林萬猛士惡若哮虎子所監

五年起家列霜戟一日過海收風帆平生流輩徒蠢蠢  
長安少年氣欲盡魏侯骨聳精爽緊華嶽峰尖見秋隼  
星纏寶校金盤陀夜騎天駟超天河欖槍熒惑不敢動  
翠蕤雲旃相蕩摩吾為子起歌都護酒闌插劔肝膽露  
鈎陳蒼蒼風元武萬歲千秋奉明主臨江節士安足數  
精緊廉悍自是子美盛年之作

仇兆鰲曰前用八句轉韻中間各四句轉末則三句  
兩句疊韻蓋歌中音調取其繁聲促節也



北風

北風破南極朱鳳日威垂洞庭秋欲雪鴻雁將安歸十  
年殺氣盛六合人烟稀吾慕漢初老時清猶茹芝

白鳧行

君不見黃鵠高於五尺童化為白鳧似老翁故畦遺穗  
已蕩盡天寒歲暮波濤中鱗介腥羶素不食終日忍飢  
西復東魯門鷄鷓亦蹭蹬聞道如今猶避風

託寄悱惻

董斯張曰魯門爰居隱然有不饗太牢不樂鐘鼓之態此老倔彊百折不回

醉歌行贈公安顏少府請顧八題壁

神仙中人不見得顏氏之子才孤標天馬長鳴待駕馭  
秋鷹整翮當雲霄君不見東吳顧文學君不見西漢杜  
陵老詩家筆勢君不嫌詞翰升堂為君掃是日霜風凍  
七澤鳥蠻落照銜赤壁酒酣耳熱忘頭白感君意氣無  
所惜一為歌行歌主客

偶然酬應必挾奇氣而出隨筆所至皆臻妙境

夜聞簷簃

夜聞簷簃滄江上衰年側耳情所嚮鄰舟一聽多感傷  
塞曲三更歛悲壯積雪飛霜此夜寒孤燈急管復風湍  
君知天地干戈滿不見江湖行路難

發劉郎浦

挂帆早發劉郎浦疾風颯颯昏亭午舟中無日不沙塵  
岸上空村盡豺虎十日北風風未迴客行歲晚晚相催

白頭厭伴漁人宿黃帽青鞋歸去來

別董頊

窮冬急風水逆浪開帆難士子甘旨闕不知道里寒有  
求彼樂土南適小長安別我舟楫去覺君衣裳單素聞  
趙公節兼盡賓主歡已結門廬望無令霜雪殘老夫纜  
亦解脫粟朝未餐飄蕩兵甲際幾時懷抱寬漢陽頗寧  
靜峴首試考槃當念著白帽采薇青雲端  
情意稠疊深得贈言之義

送顧八分文學適洪吉州

中郎石經後八分蓋憔悴顧侯運鑪錘筆力破餘地昔  
在開元中韓蔡同巔顛玄宗妙其書是以數子至御札  
早流傳揄揚非造次三人並入直恩澤各不二顧於韓  
蔡內辨眼工小字分日示諸王鈎深法更秘文學與我  
遊蕭疎外聲利追隨二十載浩蕩長安醉高歌卿相宅  
文翰飛省寺視我揚馬間白首不相棄驂騑入窮巷必  
脫黃金轡一論朋友難遲暮敢失墜古來事反覆相見

橫涕泗嚮者玉珂人誰是青雲器才盡傷形體病渴汗  
官位故舊獨依然時危話顛躓我甘多病老子負憂世  
志胡為困衣食顏色少稱遂遠作辛苦行順從衆多意  
舟楫無根蒂蛟鼉好為祟况兼水賊繁特戒風飈駛崩  
騰戎馬際往往殺長吏子干東諸侯勸勉防縱恣邦以  
民為本魚飢費香餌請哀瘡痕深告訴皇華使使臣精  
所擇進德知歷試惻隱誅求情固應賢愚異烈士惡苟  
得俊傑思自致贈子猛虎行出郊載酸鼻

振筆直書縱橫歷落行乎其所當行止乎其所不得不  
止詩境至此亦從心不踰矩時也

王嗣奭曰全篇無一字虛飾可以知其相與之情而  
愛民之真懇規友之直諒又兩見之矣

遣遇

磬折辭主人開帆駕洪濤春水滿南國朱崖雲日高舟  
子廢寢食飄風爭所操我行匪利涉謝爾從者勞石間  
采蕨女鬻菜輸官曹丈夫死百役暮返空村號聞見事

畧同刻剝及錐刀貴人豈不仁視汝如莠蒿索錢多門  
戶喪亂紛嗷嗷柰何黠吏徒漁奪成逋逃自喜遂生理  
花時甘緼袍

解憂

減米散同舟路難思共濟向來雲濤盤衆力亦不細呀  
坑瞥眼過飛櫓本無蒂得失瞬息間致遠宜恐泥百慮  
視安危分明曩賢計茲理庶可廣拳拳期勿替  
出險思懼真更事之言



宿鑿石浦

早宿賓從勞仲春江山麗飄風過無時舟楫敢不繫回  
塘澹暮色日沒衆星擘缺月殊未生青燈死分翳窮途  
多俊異亂世少恩惠鄙夫亦放蕩草草頻卒歲斯文憂  
患餘聖哲垂彖繫

過津口

南岳自茲近湘流東逝深和風引桂楫春日漲雲岑回  
首過津口而多楓樹林白魚困密網黃鳥喧嘉音物微

限通塞惻隱仁者心爰餘不盡酒膝有無聲琴聖賢兩  
寂寞眇眇獨開襟

紀行諸詩一片老境有如天降時雨山川出雲木葉盡  
脫石氣自青視入蜀詩別一境界蓋渾用力之迹而臻  
於化矣

次空靈岸

泫泫逆素浪落落展清眺幸有舟楫遲得盡所歷妙空  
靈霞石峻楓枯隱奔峭青春猶無私白日亦偏照可使

營吾居終焉託長嘯毒瘴未足憂兵戈滿邊徼嚮者留  
遺恨恥為達人誚迴帆覬賞延佳處領其要

宿花石戍

午辭空靈岑夕得花石戍岸疏開闢水木雜今古樹地  
蒸南風盛春熱西日暮四序本平分氣候何迴互茫茫  
天造間理亂豈恒數繫舟盤藤輪策杖古樵路罷人不  
在村野圃泉自注柴扉雖蕪沒農器尚牢固山東殘逆  
氣吳楚守王度誰能叩君門下令減征賦

體兼鮑謝義入風詩

望嶽

南嶽配朱鳥秩禮自百王歛吸領地靈鴻洞半炎方邦  
家用祀典在德非馨香巡守何寂寥有虞今則亡洎吾  
隘世網行邁越瀟湘渴日絕壁出漾舟清光旁祝融五  
峰尊峰峰次低昂紫蓋獨不朝爭長業相望恭聞魏夫  
又羣仙夾翱翔有時五峰氣散風如飛霜牽迫限修途  
未暇杖崇岡歸來覲命駕沐浴休玉堂三歎問府主曷

以贊我皇牲麋忍衰俗神其思降祥

岱華二詩筆意峭拔各極其變此則另闢一格出以典  
重以明德惟馨之意勗勵守土尤有立言之旨非徒得  
郊壇登歌氣象

沈德潛曰靈光縹緲氣象肅穆漢人練時日帝臨諸  
章是此詩原本

岳麓山道林二寺行

玉泉之南麓山殊道林林壑爭盤紆寺門高開洞庭野

殿脚插入赤沙湖五月寒風冷佛骨六時天樂朝香爐  
地靈步步雪山草僧寶人人滄海珠塔劫宮牆壯麗敵  
香厨松道清涼俱蓮花交響共命鳥金榜雙迴三足鳥  
方丈涉海費時節玄圃尋河知有無暮年且喜經行近  
春日兼蒙暄暖扶飄然斑白身奚適傍此烟霞茅可誅  
桃源人家易制度橘洲田土仍膏腴潭府邑中甚淳古  
太守庭內不喧呼昔遭衰世皆晦迹今幸樂國養微軀  
依止老宿亦未晚富貴功名焉足圖久為野客尋幽慣

細學何顛免興孤一重一掩吾肺腑山鳥山花吾友于  
宋公放逐曾題壁物色分留與老夫

排比綿麗

王嗣奭曰全篇一氣杼寫如珠走盤

歲晏行

歲云暮矣多北風瀟湘洞庭白雪中漁父天寒網罟凍  
莫徭射雁鳴桑弓去年米貴闕軍食今年米賤大傷農  
高馬達官厭酒肉此輩杼軸茅茨空楚人重魚不重鳥

汝休枉殺南飛鴻况聞處處鬻男女割慈忍愛還租庸  
往日用錢捉私鑄今許鉛錫和青銅刻泥為之最易得  
好惡不合長相蒙萬國城頭吹畫角此曲哀怨何時終  
聲哀厲而彌長其氣之老正在參錯中

追酬故高蜀州人日見寄

并序

開文書帙中檢所遺忘因得故高常侍適往居在成  
都時高任蜀州刺史人日相憶見寄詩淚灑行間讀  
終篇末自枉詩已十餘年莫記存歿又六七年矣老



病懷舊生意可知今海內忘形故人獨漢中王瑀與  
昭州敬使君超先在愛而不見情見乎辭大歷五年  
正月二十一日却追酬高公此作因寄王及敬弟

自蒙蜀州人日作不意清詩久零落今晨散帙眼忽開  
迸淚幽吟事如昨嗚呼壯士多慷慨合沓高名動寥廓  
歎我悽悽求友篇感時鬱鬱匡君略錦里春光空爛漫  
瑤墀侍臣已冥冥瀟湘水國傍鼃鼃鄠杜秋天失鵝鷄  
東西南北更誰論白首扁舟病獨存遙拱北辰纏寇盜

欲傾東海洗乾坤邊塞西蕃最充斥衣冠南渡多崩奔  
鼓瑟至今悲帝子曳裾何處覓王門文章曹植波瀾闊  
服食劉安德業尊長笛誰能亂愁思昭州詞翰與招魂

蘇大侍御訪江浦賦八韻紀異

并序

蘇大侍御渙靜者也旅於江側凡是不交州府之客  
人事都絕久矣肩輿江浦忽訪老夫舟楫而已茶酒  
內余請誦近詩肯吟數首才力素壯詞句動人接對  
明日憶其湧思雷出書篋几杖之外殷殷留金石聲

賦八韻記異亦見老夫傾倒於蘇至矣

龐公不浪出蘇氏今有之再聞誦新作突過黃初詩乾  
坤幾反覆揚馬宜同時今晨清鏡中勝食齋房芝余髮  
喜却變白間生黑絲昨夜舟火滅湘娥簾外悲百靈未  
敢散風破寒江遲

結語竒妙耐人百咏

仇兆鰲曰詩止七韻而題云八韻用韻取耦不取竒  
也

孫光憲曰渙有變律詩十九首上廣帥李公唐人謂  
渙詩長於諷刺得陳拾遺一鱗半甲後以作亂伏誅  
題衡山縣文宣王廟新學堂呈陸宰

旄頭萑紫微無復俎豆事金甲相排蕩青衿一憔悴鳴  
呼已十年儒服弊於地征夫不遑息學者淪素志我行  
洞庭野歛得文翁肆僂僂胄子行若舞風雲至周室宜  
中興孔門未應棄是以資雅才渙然立新意衡山雖小  
邑首唱恢大義因見縣尹心根源舊宮闕講堂非曩構

大屋加塗墜下可容百人牆隅亦深邃何必三千徒始  
壓我馬氣林木在庭戶密幹疊蒼翠有井朱夏時轆轤  
凍階祀耳聞讀書聲殺伐災髣髴故國延歸望衰顏減  
愁思南紀改波瀾西河共風味采詩倦跋涉載筆尚可  
紀高歌激宇宙凡百慎失墜

氣體肅穆便可作此邑修學記

何焯曰感慨頓挫自成有韻之文



御選唐宋詩醇卷十二



總校官庶吉士臣張能照

校對官中書臣王鍾泰

謄錄貢生臣趙希濬